

# Advent

In der Zeit, in der merr ewe sinn, giehts nitt onnersders, merr muss iwwer de Advent babbele. Dess hott aach de Schorsch gemoond, alser misch oogerufe hott.

Honnes, hodder gesaad, mir hawwe Advent unn hadde joo omm Somsdaach unn Sunndaach Weihnachtsmarkt gehabbd, ward ihr dort gewese?

Naa, habb isch ze Antwort gewwe, weil im Aacheblig hawwe merrs e bissi vill mett unserne Knoche ze due.

Ess iss joo aach kalt gewese, seet de Schorsch, awwer unser Kinner unn Enkel wolde mol hie unn doo sinn merr halt mettgonge.

Habderr ordendlich Geld ausgewwe?, habb isch gefroochd, weil ess sinn joo su vill Oobieder unn Ständ doogewese, doo habderr eich joo aussuche kenne, wo eier Geld hiegiehd.

De Schorsch druff: Honnes, vill mieh wie e Broodworschd esse unn enn Gliehwoi drinke mache mir Alde joo nimmi. Die Junge guggle sisch um, die finne aach immer ebbes ferrs Mettnumme unn su solls joo aach soi, moonsde nitt?

Ei klar, saach isch, awwer mol ebbes onnersders: Hott doi Fraa schunn Plätzjer geba-cke? Moi hott sechs odder siwwe Sorte gemachd unn hott gegrinsd als se droo gedenkt hott, dass zu der Zeit, wo isch moi Geschäft hadd, mieh wie zwonnsisch Sorte geba-cke hott. Zu dere Zeit hott merr noch soine Geschäftsfreunde unn dene ihrne Sekretä-rinne su kloone Geschenke mache derrfe ohne dass merr sisch deferr ennschuldische musst wie heitzedaach, wo dess als Bestechung odder Oomache verstonne werdd. No ja, Schorsch, dess iss long her, jetz schunn zwonnsisch Johr.

Unn isch bin schunn sechsunzwonnsisch Johr in Rente, seet de Schorsch, isch bin jetz schunn su long in Rente, wie monscher junge Kerl, der studiert unn in Frührente gieht, insgesommd in soim Lewe schaffe dut. Ach Honnes, dess sinn su unser Gedonke im Advent.

Isch saach: Ach Schorsch, isch moon, ess dut koon rischdische Advent mieh gewwe, weils aach koo rischdisch Weihnachte mieh gewwe dut.

No Honnes, seet de Schorsch, nodierlich duts noch e rischdisch Weihnachte gewwe, gugg doch in die Geschäfte.

Ich habb ins Telefon gegrint. Grad weil isch in die Geschäfte gugg saach isch dess mett Weihnachte. Eischendlich duts ferr uns joo schunn immer zwaa Weihnachte ge-wwe, oons ferr die Kinner mett Chrissboom unn Geschenke unn oons ferr die gons Fa-milie mett Mette unn Gottesdienst unn mett dem was Weihnachte iss: Ein Kind ist uns geboren! Awwer dess Chrisskinnsche duts nimmi gewwe, dess iss jetz de Weihnachts-monn, unn Chrissbeem duts nimmi gewwe, dess sinn jetz Weihnachtsbeem. Unn glaab merrs, dess sinnse aach nimmi long, donn werrn se Jahresendbeem gedaafd. Unn weils schunn seit e paar Monat iwwerall Lebkuche unn Weihnachtsmänner gewwe dut unn jed Kind die Geschenke, dies villeischd kriecht, beim Aldi schunn geseh hott lieht die Iwwerraschung ferr die Kinner nor noch doodroi, ob dess Smartfon, wasse geschenkt krieh, deirer iss als dess was ihr best Freundin odder ihrn beste Freund geschenkt kriecht hott.

Honnes, moont doo de Schorsch, bei uns dehoom isses nimmi su, weil aach unser En-kel schunn gruß sinn unn sisch vumm geschenkte Geld kaafe kenne wasse wolle.

Isch saach: Dess iss bei uns nitt onnersders.

Eiern Honnes